

Hidajet Pozderac, inž.geodezije



Dana 02.11.2001. godine ostali smo bez istaknutog inženjera, službenika općine Tuzla i dragog kolege Hidajeta Pozderca. Rođen je 18.09.1937. godine u Cazinu. U rodnom gradu je stekao osnovno obrazovanje, a odmah poslije toga upisuje se i završava srednju geodetsku školu u Zagrebu. Kratko radi u rodnom Cazinu, a potom dolazi u Tuzlu. Godine 1961. se zapošljava u birou za geodetske radove tadašnjeg tuzlanskog sreza. Hido kako su ga svi zvali, radi u Službi za geodetske i imovinsko-pravne poslove općine Tuzla nepunih 40 godina, gdje ga zatiče i iznenadna smrt.

U toku rada na stručnim geodetskim poslovima, kao izuzetno vrijedan i ambiciozan službenik, upisuje i završava vanredno Višu geodetsku školu u Sarajevu, gdje 1971. godine stiče zvanje inženjera geodezije. Zbog svojih vrlina i vrijednog rada 1975. godine biva postavljen na mjesto direktora tadašnje Geodetske uprave Tuzla.

U svom dugogodišnjem stručnom radu Hidajet Pozderac se zalagao na prenošenju znanja na mlađe kolege. Po osnivanju srednje geodetske škole u Tuzli 1981. godine se angažuje kao predavač stručnih predmeta.

Odmah po dolasku u Tuzlu 1961. godine Hido se društveno angažuje i učestvuje u osnivanju i zaživljavanju stručnog Udruženja geodetskih inženjera i geometara. U djelovanju ovog Udruženja, Pozderac je dao nemjerljiv doprinos. Bio je dugogodišnji član predsjedništva Udruženja, a dva puta je biran i za predsjednika. Ponajviše zahvaljujući njemu, u toku rata je održana obnoviteljska skupština ovog Udruženja.

Za svesrdan rad više puta je dobijao priznanja Udruženja građana geodetske struke Bosne i Hercegovine.

Posljednje priznanje Pozderac Hidajet je dobio 06.10.2001. godine prije iznenadne smrti, a u povodu 40. godišnjice rada Udruženja građana geodetske struke "GEODET", Tuzla. Iako narušenog zdravlja Hidajet se veoma aktivno uključio u pripreme za obilježavanje ovog vrijednog jubileja.

Svojim stručnim znanjem, velikim i bogatim radnim iskustvom, Hidajet Pozderac je dao nemjerljiv doprinos u stručnom i organizacionom radu općinske geodetske Uprave.

Hido je bio omiljen među kolegama, poznat i priznat među građanima Tuzle. Uvijek se trudio da pomogne svima koji su tražili njegovu pomoć.

Nije se zanimao samo geodezijom nego je volio i putovanja, muziku, pčelarstvo i druge aktivnosti, ukratko sve ono što može doprinijeti boljitku svoje zajednice.

Svi mi koji smo radili i družili se sa Hidom, ili bili članovi njegove porodice, možemo biti ponosni što smo imali takvog kolegu, prijatelja, supruga, oca, djeda ili rođaka.

Hvala mu za sve što je učinio za geodetsku struku i geodeziju Bosne i Hercegovine.

Rado Fazlić